



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### Capitvlaria Regvm Francorvm

Additae sunt Marculfi monachi & aliorum formulae veteres, & Notae  
doctissimorum virorum

**Baluze, Etienne**

**Parisiis, 1677**

Ejusdem Ludovici epistola ad Eugenium II. missa per Hieremiam & Ionam  
Episcopos, cum actis synodi Parisiensis.

**urn:nbn:de:hbz:466:1-19366**

## EPISTOLA AD EVGENIVM II. PAPAM

Missa per Hieremiam & Ionam Episcopos, cum actis synodi  
Parisiensis.

Sacratissimo ac reverendissimo Domino & in Christo patri Eugenio summo Pontifici & universali Papæ Hlodouivici & Hlotharii divina ordinante providentia Imperatores Augusti, spiritales filij vestri, sempiternam in Domino nostro Iesu Christo salutem. Quia veraciter nos debitores esse cognovimus ut his quibus regimen Ecclesiarum & ovium dominicarum cura commissa est in omnibus causis ad divinum cultum pertinentibus opem atque auxilium pro qualitate virium nostrarum & intellectus nostri capacitate feramus, idcirco prætermittere nequimus quin tunc, quando legati Græcorum nobis manifestaverunt qualem ad vos deberent perferre legationem, summa cura ac sollicitudine tractarem quale vobis adjutorium in hoc negotio cum Dei auxilio exhibere potuissemus. Et ob hoc à vestra sanctitate petivimus ut sacerdotibus nostris liceret de libris sanctorum patrum sententias querere atque colligere quæ ad eandem rem pro qua iidem legati vos consulturi erant veraciter definiendam convenire potuisent: quas cum illi juxta concessam etiam à vobis licentiam solerter inquirerent, & divina opitulante gratia quicquid invenire tam brevi temporis spatio potuerunt collegissent, nobis ea perlegenda direxerunt. Quibus perlectis, ea vestræ sanctitati legenda atque examinanda per hos legatos nostros, Hieremiam scilicet & Ionam venerabiles Episcopos, mittere curavimus; cum quibus, si vestra paternitas dignum duxerit, de eadem legatione quæ in Græciam à vobis mittenda est non inutilem sed potius proficuum conlationem habere potestis, quia & in sacris sunt literis admodum eruditi, & in rationibus disputatoris non minimum exercitati. Quos non ob hoc ad vestræ almitatis præsentiam cum memoratis sententiarum collectionibus misimus ut hic aliquo velut magistris officio fungerentur, aut huc do-

cendi gratia directi putarentur: quia, sicut jam commemorati sumus nos debitores existere ut huic sacratissime sedi in quibuscunque negotiis auxilium ferre debeamus, ideo & hos Missos & quas deferunt litteras, si quid vobis adjutorij conferre potuisent, mittere dignum duximus. Hos vestræ sanctitati commendamus, ut & benignam apud vos receptionem & familiariter vobiscum loquendi locum inveniant. Novit quippe sanctitas vestra qualiter populus Græcorum in hac imaginum veneratione divisus sit. Ideo rogamus ut almitas vestra curam & diligentiam adhibere dignetur quomodo per vestram saluberrimam doctrinam atque admonitionem magis ad concordiam & unitatem revocetur quam propter hoc ad majorem discordiam & disensionem impellatur. Et ideo cautissime considerare debetis ut legatio vestra, quam illuc dirigere disponitis, tanta prudentia tantoque moderamine suffulta sit ut à nemine, neque Græco, neque Romano, justè valeat reprehendi, sed talis sit qualem semper decet in omnibus causis ab ista sacratissima sede proficisci. Et si vestræ sanctitati placet ut pro hac ipsa legatione Missi nostri simul cum vestris illas in partes dirigantur, & hoc nos tempore congruo scire permittite. Et non solum hoc, sed etiam si ituri sunt, ubi & quando cum vestris Missis se jungere debeant. Non ideo tamen de Missis nostris illuc dirigendis interrogamus quasi necessarium nobis videatur, aut nos vestros Missos hanc legationem per se perficere dubitemus; sed potius propter hoc eos vobis offerimus ut sciat nos in omnibus esse paratos quæ hujus sacratissime sedis necessitas aut voluntas postulaverit. Optamus sanctam & venerabilem ac piam paternitatem vestram semper in Christo bene valere & nostri ac nostrorum omnium in sacrosanctis orationibus meminisse, sanctissime ac beatissime pater.

